

TEN-LA JEEMS SI NMUNSA

¹ Mi-na Jeems si ɲaa Wia ari la Tiina Yesu Kirisito tintinna, mii chuolema Juu tinɲaa kala si laa Yesu wiaa dii a pisa a he nialin si bi Juu tinɲaa ɲaa tuɔɲ.

Yarida ari wu-jiminɲ wiaa

² Mi naanbiirinɲ, di wu-yiri-na kala ne juuma, má leɲ duu ɲaa ma tuɔtɔru.

³ Di ma ní na heɛɲ wii le aɲ ha ɲaa Wia yarida, ma jaɲ wasa chinɲ ma yarida le a keɲ kenyiri.

⁴ Má leɲ di ma wuo keɲ kenyiri a nyalima mu dɛɛɛ, di ma wuo ku ɲaa tuɔ-pul timma a sí kuɲ-kala che ka.

⁵ Wiaa deenɲba le, di nuu ne he ma tuɔɲ a bi wu-jiminɲ kene duu wuo jin wii-la u si jaɲ ɲaa, má leɲ di tiina sul Wia duu pu wu-jiminɲ. U keɲ zile a joɲ wu-jimii-la a pi nuu-kala si sulu. U bi ba kuɲ-kala ka kiri.

⁶ Ama di ɲ ne sul Wia duu pinɲ kuɲ, laa dii ari u jaɲ ɲaa wii-la pinɲ. Sí tuɔbiinaa balia keɲ ari u jaɲ ɲaa koo u bi ɲaa. Nii-la kala si sul Wia chiche kuɲ aɲ keɲ tuɔbiinaa balia, u nage lii-pelinɲ si he fuoɲ tuɔɲ ne. Pelinɲ yie ɲmobu a kaa mu sipaanɲ, aɲ bira ɲmoo kɔ harinɲ maa.

7-8 Nii-la kala si keŋ tuɔbiinaa balia a bi wu-bala ɛ china wii-kala u sí ɲaa ɛ, u tiina sí yielu ari la Tiina Wia jaŋ joŋ kuŋ-kala pu.

Nialin si ɲaa summoo ari nialin si keŋ kiaa wiaa

9 Nii-la si bi lee keŋe dunia ɛ nialin si laa Yesu wiaa dii tuɔŋ, má leŋ duu tuɔŋ tɔre ari Wia si pu lerin.

10 Nii-la ma si ɲaa kiaa tiina nialin si laa Yesu wiaa dii tuɔŋ, má leŋ duu ma tuɔŋ tɔre ari Wia si kenu kaa muuri. U bi jaŋ dieni aŋ suu, a nage yaŋ si yie fiile u bí dieni aŋ hihil ɲii.

11 Bɛɛ wiaa, wia yie pɔse, lerin faasa lin. U wulimin ɲaa yaŋ-la hil. U filaa yuori. U zɔmun ɛɛ. Nii-la si keŋ kiaa ma nage ɲii nɛ. U ha jaŋ titin u tintinɲaa aŋ suu kage.

12 Wia jaŋ pɛ nii-la wiin si jua ɛ, aŋ ka u wuo nyalime a chin u yarida ɛ. U si wuo nyalime ɲii, Wia jaŋ joŋ miisi-la si bi dɛre a tɔmu, miisi-la u si si u jaŋ joŋo pi nialin kala si chou.

Nii la si jaŋ ɲaa di wii nɛ juula ɛ

13 Di nuu-kala nɛ juu wii, u bi maga di tiina bul ari Wia nɛ magisu. Nuu-kala bi Wia wuo nyise duu ɲaa wu-bɔŋ, u titia ma bi nuu-kala ka nyise duu ɲaa wu-bɔŋ.

14 Tuɔbiin-bɔmɔ-la si he nuu tuɔŋ nɛ yie nyise nuu-kala duu ɲinɲaa wu-bɔŋɲɔɔ. Tuɔbiin-bɔmɔ-la nɛ yie kenu yerɲi.

15 Duu nɛ seye duu to tuɔbiin-bɔmɔ-la ɛ, ba yie ɲaa u juu haache ɛ. Haache-la yie ku yuge. Duu nɛ ku yuge lerin kala, u yie ɲaa nii-la suu.

16 Mi naanbii-kpianaba, ma sí ma titia nyisu.

¹⁷ Ku-zoŋ-na kala lii Wia teen ɛ. U ɛ ta kialin kala si he wia nyun ɛ a chaane. Ama di ba ɛ jua, birimin yie he dime. Wia titia bi nii naga. U bi birime.

¹⁸ U tuotɔrun ɛ ɛ u laa sipaan bul u niin wiaa si ɲaa wutitii a pila di la wuo tutoba, di Wia wuo ɲaa di la ɲaa u biirin. U ɲaa nii di la wuo ɲaa u bunbun biirin, ka di ku-kaanaa-na tuto.

La sii nii wiaa nii ari la sii ɲaa wiaa nii

¹⁹ Ma jin wiaa deenba kala ɛ. Nii wiaa, ma leŋ di nuu-kala ɲaa lima a jegilee nii wiaa niaa teen worun. Di ma nii che ma bul wiaa maa, ma fiele an-na bul. Di ma che ma na baanin maa, ma si guu na,

²⁰ bee wiaa nii-la sii na baanin bi jan wuo ɲaa wialin sii to wonbiin Wia teen.

²¹ Nii wiaa, ma liise ma titia wu-bon wu-ɲaalaa ɛ a via wu-bomɔ-la kala si gollima. Ma keŋ ma titia muuri Wia sipaan a sei Wia niin wialin u si dagema. Ma laa he ma tuon ɛ. Wialin keŋ dolun a wuo laama tita.

²² Ama u maga di ma tuto wialin Wia si si di ma ɲinaa ɛ. U bi maga di ma ninii wialin dunɔun. Di ma nii wialin an bibaa ɲaa, maa nyise ma titia ɛ.

²³ Di nuu-kala ɛ nii wialin an bibaa ɲaa, u nage nia si jon beenantire a bee na u nagingin ɛ.

²⁴ U yie beŋ a na u titia beenantire-la tuon. Di u ɛ surisa lii, u yu nii u si naga.

²⁵ U nage nii ɛ wialin Wia si leŋe ba ɲmunsa bil di niaa tuto tuon ɛ. Wiaa deenba kala ɛ

zomɔ kinkeŋ. Wu-nyiarin bi guolo. Ba wuo laa niaa tita ne. Di nuu ne na wiaa deenba, a nyalima ŋaa wialin u si na, a bí yu aŋ haa ŋaa mumu, Wia jaŋ peu le wialin kala u síi ŋaa le.

²⁶ Di nuu ne joŋ u titia ari u to Wia ne, aŋ bi u titia keŋe ari wialin u síi bul le, uu nyise u titia ne. U Wii-chuɔluŋ ma ŋaa pei ne.

²⁷ La Nyimma Wia wonbiiŋ tonuŋ u si daga ari u ŋaa wonbii-titii ne ŋla: Má mu nina biisinsin ari yo-haala-la síi na heeŋ a pe pipeba le, aŋ liise ma titia dunia niaa wu-ŋaalaa le di ba disinnin síma digu.

2

Má pɔ di ma sí niaa kaa pupɔre dɔŋɔ le

¹ Mi naanbiirin, leelee ma laa la Tiina Yesu Kirisito wiaa dii ne, u-na yiri-balin Tiina. Nii wiaa u bi maga di ma joŋ niaa dɔŋsuŋ jirima aŋ beŋ dɔŋsuŋ maa, ma siaa bibaa su, a keŋ niaa pupɔre nii.

² Má leŋ di la joŋ ari niaa balia ne ku juu lee-la nialin si laa Yesu wiaa dii si hilime. Dɔŋɔ keŋ kiaa a laale geri-zɔŋŋɔɔ a joŋ selime neni-piraa a kpiere u titia. Dɔŋɔ ma ŋaa summu a ma laale geri-kɔsumɔɔ.

³ Nii ne ma keŋ nii-la si laale geri-zɔŋŋɔɔ woruŋ a pu di-hɔŋ-zomuŋ u hɔŋ, aŋ bula pi nii-la si laale geri-kɔsumɔɔ duu hɔŋ tinteen koo duu chin dime.

⁴ U nii zomɔ nee? Di ma ne ŋaa nii, ma tuobiinaa bi wu-bala le china, maa pɔre niaa ne nii. Ma yie keŋ ma tuobiin-lɔrunu-la ne a laa

niala wiaa jijin a didageba, a kenba pore donjo le. U nii bi zon.

⁵ Mi naanbii-kpianaba, ma jegile nii mi teen. Nialin si naa summoo dunia deen le ne, Wia tuose di ba laa u wiaa dii a juu Wia kuorii-la, lee-la u si si nialin si chou jan juu. Ba jan juu a sene kuori.

⁶ Ama ma bi worun ka naa, ma si yie naa wiaa juuu summoo le nii. Na, kiasa tinnaa ne yie gurema a didii dolun ma ma le a yie fuga kenma mu sariya didiilin.

⁷ Ba yie chichei yiri-zon-la Wia si jonjo he pima.

⁸ Ba nmunse Wia tenin tuon a bul nla ne: “Cho n donjo tiina ari n si cho n titia nii.” Di ma ne sene to nin deen, ma naa worun ne. La Kuoro Wia ne jon nin deen pila.

⁹ Di ma ne ken niala pupore a jujon donsun jirima, an ka ma siin bi donsun su, maa naa haache ne. Wialin Wia si leje ba nmunsa bil di niala tuto daga ari ma tele ne.

¹⁰ Di nuu ne paala tuto wialin kala ba si nmunsa bil di niala tuto an chei ba tuon wu-bala maa, u naga u chei wialin kala ne nii Wia sipaan.

¹¹ Wia-la si si di ma si niala haalaa che, u titia ne si di ma si niala kpu. Di ma ne bi niala haalaa che an kpukpu niala, ma ha chei Wia nin wialin u si bile ne.

¹² Di ma ni bul wiaa an pe ninnaa wialin, ma liise yi ari Wia jan to ma wu-bulaa ari ma wu-naalaa le ne a dii ma sariya. U jan to wialin le ne u si leje ba nmunsa bil di niala tuto a dii ma sariya. Wiaa deenba ne laa niala tita.

¹³ Di nuu ne bi niaa nennige ka fá, Wia ma bi jan fá tiina nennige bua-la le u si jan didii niaa sariya. Ama nii-la si fá niaa nennige bi jan fá wii-kala sariya-la che-diilin.

Nii la si jan dage ari laa nya yarida

¹⁴ Mi naanbiirin, di nuu ne si u laa Wia wiaa dii ne an bi wialin Wia si cho ka nya, u nii zomoo? Duu yarida nage nla, ma biina Wia jan laau ta koo?

¹⁵ Má len di la jon ari ma naanbie bi geri-zonoo kene a bi u niin kudiilee wuo na dii.

¹⁶ Nii ne ma bula pu a bul, “Wia jan pen le a pin kialin n sii che.” Di ma ne nya nii an bi seye di ma peu le ari kialin u sii che, u nii zomoo?

¹⁷ Nii wiaa, di nuu ne si u laa Wia wiaa dii an bi wialin Wia si cho ka nya, u yarida-la nya pei ne.

¹⁸ N bi poo nuu don jan he dime a bula pin ari u laa Wia wiaa dii ne. Dono ma bul duu maa nya wu-zonoo ne. Duu ne bul nla, mi jan piesu a bul, “Di n ne bi wu-zonoo nya aa pe n yarida le, ee ne n jan wuo dagemi ari n sene laa Wia wiaa dii nee? Mi-na nya wu-zonoo ne a dagin nii ari mi sene laa Wia wiaa dii ne.”

¹⁹ N jima ari Wii-bala ne he dime koo? Di n ne jin nii, u nya wu-zon ne. Ama si yu ari jin-bonoo ma jin nii le ne, nii nya fawullun kenba, ba chichel.

²⁰ Bee ne tii ma yaare nla a biine di nuu jan wuo laa Wia wiaa dii an bi wu-zonoo nya pipe? Má len di mi dagema ari nuu ne si u laa Wia wiaa dii ne an bi wu-zonoo nya pipe u yarida-la le, u yarida-la nya pei ne.

²¹ Má liisi la naabalima Abiraham wiaa. Bεε nε tii Wia lenj Abiraham wuo ηaa tuo-pul tiina u sipaanj? Wii-la si tii nε ηla: U to Wia niinj, Wia si bula pu duu kenj u bie Aizik a kaa mu kpu a pu. Nii nε u sii kenj Aizik mu di u kpu a pu.

²² Abiraham laa Wia wiaa dii nε a faa ηaa wialinj maa Wia si cho. U ηaa wu-zoηηoo a pε u yarida-la le. Nii nε u yarida sene wasa su.

²³ U si ηaa nii nε, wialinj ba fa si ηmunsa Wia teninj tuoj ku ηaa wutitii. Ba fa ηmunsa ari Abiraham laa Wia wiaa dii, nii nε tii Wia lenj u wuo ηaa tuo-pul tiina u sipaanj. Nii wiaa nε niaa paala kenu yiyire Wia nanɔɔnj.

²⁴ Nii daga ari wialinj nuu sii ηaa nε yie tii Wia lenj u wuo ηaa tuo-pul tiina u sipaanj. U si laa Wia wiaa dii dunɔɔnja-la dee bi tii.

²⁵ Nla titia nε u fa nage Rehab ma le. U fa ηaa ha-chorunj nε. Iziral tinηaa tinɔɔaraa si ko u teenj, u kenjba worunj. Ba sii che di ba luora lii fá viiri, u dageba wonbii-tanii nε ba to a fá lel ba dinɔɔɔnjoo nisinj le. A tinj u si ηaa nii wiaa, Wia lenj u wuo ηaa tuo-pul tiina u sipaanj.

²⁶ Di nuhuobiine nε bi wiese kene, u bi wei. Nii-la saa si laa Wia wiaa dii anj bi wu-zoηηoo ηaa pipe u yarida-la le, u tiina ma nage nii nε. U yarida-la ηaa pei nε.

3

La nenɔɔdeliminj si nage nii

¹ Mi naanbiirinj, ma tuoj, ma sí chiche di ma yuge a wiwalime di ma didage ma donsunj tinηaa si laa Yesu wiaa dii, bεε wiaa ma jima di

ba ní dii dunia niaa sariya, ba jaŋ faasa dii la nialin síi dage niaa sariya ne a kii la doŋsun tinŋaa.

² La kala yie ŋaa wiaa piperiki ne. Di nuu ne bi wiaa bula piperiki, u bi wii-kala keŋe. U wuo keŋ u titia ne wialin kala u síi ŋaa le.

³ Na jaaba, di nuu níi che duu dagu, u yie joŋ jaaba niin koŋ ne a he jaaba niin le. Koŋ-la le ne u yie keŋ, a didage joŋ-la u mumu lee-la kala u síi che duu mu.

⁴ Bira na liin daborusun maa. Ba ŋaa ku-balaa ne. Peli-duoŋ yie lu a kaa ven. Ama daanyi-bie ne he dime. Nii-la si keŋ liin daboro-laa ven, u yie keŋ daanyi-bie-la a kaa dage a ŋaa u mumu lee-la kala u síi che.

⁵ Nii ne nuhuobiine neŋdelimin ma nage. U bi wii-kala maga aŋ bubul wu-balaa. Ma jima ari nyin-gelin ma bi yuge aŋ jaŋ wuo chol giri-balin a diu kala.

⁶ Nuhuobiine neŋdelimin ma nage nyinin ne. U jaŋ wuo ŋaa wu-boŋ kala si he dunia le. U ŋaa la yaraa seme doŋo ne. Ama u wu-boŋhoŋo u si yie ŋaa yie cheŋ la yaraa kala ne u chei. U yie chol nyinin ne a dii nii halii nuhuobiine miisin kala le. Nyin-la yie lii Sitaani lerin ne a chol.

⁷ Nuhuobiine keŋ pusun kala dolun ne: Baga kiaa ari diibiisin, ari kialin kala síi tuuri tinteen, ari liin tuoŋ kiaa. U keŋba kala dolun ne.

⁸ Ama nuu-kala bi neŋdelimin dolun keŋe duu kaa bil duu ŋaa fululu. U ŋaa ku-boŋ ne a keŋ huon-la síi kpu niaa.

⁹ La yie keŋ la neŋdelimee ne a kaa didenne

Wia si ɲaa la Tiina a ɲaa la Nyimma maa, aɲ bira keɲ neɲdelime-la titia a kaa tutuuse la doɲsun tiɲɲaa maa Wia si ɲaa ba nagu.

¹⁰ Nɲi-la titia la si kaa denne Wia, u titia ne la kaa tuuse niaa. La naaɲbiirin, u bi maga di ɲla ɲiɲaa.

¹¹ Lii-bul-sii-bala bi jaɲ wuo bul lii-zomun ari lii-lorun kala.

¹² Tutogo ma bi jaɲ wuo neɲ babilaa. Chichueɲ ma bi jaɲ wuo neɲ tutogo naɲbilaa. Nɲi titia ne lii-la si nage yisin ma bi jaɲ wuo birime lii-zomun.

Wu-jimii-la si lii Wia teen si nage ɲii

¹³ Ma tuon nialin si keɲ wu-jimin, ma siaa ma suri, u maga di ma ɲiɲaa wu-zonɲoo ne a keɲ ma titia muuri, a dage ɲii ari ma sene keɲ wu-jimin ne.

¹⁴ Ama di ma ne faasa keɲ yaribierin doɲo le, a chil ma dunɲuna wiaa, aɲ didage ma titia ari ma keɲ wu-jimin, maa nyia ne.

¹⁵ Wu-jimin deen yiri bi Wia teen lia. U ɲaa dunia wii ne a lii dunia niaa tuobiinaa le ari Sitaani teen.

¹⁶ Di niaa ne faasa keɲ yaribierin doɲo le a chil ba titia wiaa dunɲuna, ba jaɲ keɲ nii-liaba, a yuyuo doɲo, a ɲiɲaa wu-bonɲoo yuyuge.

¹⁷ Ama wu-jimii-la si lii Wia teen zomɔ kinkeɲ. Wu-bon kala tuo u le. Nii-la kala si keɲ wu-jimin deen, yie hon ne som a kikerɛ yuosun, a keɲ zile. U yie jegilee nii niaa niin wiaa. U yie fifa niaa nennige ma ne worun. U yie ɲiɲaa

wu-zɔŋŋɔɔ nɛ. U bi tuɔbiinaa balia ma kenɛ a bi nii-sima ma kenɛ.

¹⁸ Nanjejeeree yie hɔŋ sɔm nɛ aŋ pɛ niaa ma lɛ di ba ma hɔŋ sɔm, a ŋɪŋaa wialɪŋ Wia si cho.

4

La to Wia hariŋ koo la to dunia niaa hariŋ?

¹ Bɛɛ nɛ ma yie guraa yuo dɔŋɔ? Wii-la si tii nɛ ŋla: Ma chil ma titia tuɔtɔrɛ wiaa nɛ ma tuɔŋ lɛ a chichɛ di maa ŋaa wu-bɔŋŋɔɔ, ŋii nɛ tii.

² Ma cho di ma kɛŋ kiaa aŋ bi baa na, ŋii nɛ tii ma cho di maa kpu dɔŋɔ aŋ laa. Ma yie hihienɛ kialɪŋ aŋ bi wuo na. Ŋii nɛ tii ma guraa yuo dɔŋɔ ŋii. Wii-la si tii ma bi kialɪŋ ma si cho kenɛ nɛ ŋla: Ma bi Wia sul duu joŋo pima.

³ Bua dɔŋɔ ma lɛ ma yie sɛnɛ sulu a chichɛ kiaa. Ama ma yie kɛŋ tuɔbiɪŋ-bɔŋŋɔɔ nɛ a sul. Ŋii nɛ tii ma bi laa.

⁴ Ma nage haala bira si bi u bala niɪŋ ka to nɛ. Ma bi jɪŋ ari nii-la kala si joŋ u nyuŋ kala hɛ dunia kiaa lɛ ŋaa Wia dɪŋdɔŋ nɛɛ? Wutitii, nii-la kala si joŋ u nyuŋ hɛ dunia kiaa lɛ birime Wia dɪŋdɔŋ nɛ.

⁵ Ma biina wialɪŋ ba si dage Wia teniŋ tuɔŋ bi bubuɔŋ kenɛɛ? Ba ŋmuŋsa ari Wia faasa cho di u duŋduŋa nɛ tii la kala. Di la bi sɛye duu tiila, u didii hadɔruŋ.

⁶ Ama Wia fála nennige woruŋ a pipela lɛ di la joŋ la titia kala a pu. Ŋii nɛ tii ba ŋmuŋse Wia teniŋ tuɔŋ ari Wia via nialɪŋ síi bigisi ba titia lɛ aŋ pipe nialɪŋ si kɛŋ ba titia muuri lɛ.

⁷ Nii wiaa, má jon ma titia a he Wia nisij le. Má jon harij yia Sitaani, u jan fá lel.

⁸ Má surisa mu kpage Wia, u ma jan ku kpage ma. Má sɔj ma nisaa liise wu-bɔŋŋɔɔ ŋaaniŋ le a pulle ma tuɔj, a bira sí tuɔbiin-ɔrunun biinu, bɛɛ wiaa ma keŋ tuɔbiinaa balia balia ne.

⁹ Má leŋ di ma tuɔj chei. Máa yel sii-liiriŋ. Má leŋ di ma tuɔɔrun birime tuɔ-cheeŋ.

¹⁰ Má keŋ ma titia muuri Wia sipaan. Di ma ne ŋaa nii, u jan keŋma chuule.

Má pɔ ma sí ma dɔŋsun tiŋŋaa wiaa laa jin

¹¹ Mi naanbiiriŋ, ma sí ma dɔŋsun tiŋŋaa yiriŋ chei. Nii-la kala si chei u dɔŋɔ tiina yiriŋ koo u bul u teen maa a bul duu cheye ne, u naga tiina ma bul wu-bɔŋ ne a tige wialiŋ Wia si leŋe ba ŋmuŋsa bil di niaa tuto le ne, a bul ari ba bi zɔŋ. Di nuu ma ne bira bul di wialiŋ bi zɔŋ, u ma bira bi wialiŋ to. U miira jon u titia ari u yuga ne a kii wialiŋ Wia si leŋe ba ŋmuŋsa bil.

¹² Wia dunɔɔna ne keŋ dolun duu bil wiaa pi niaa di ba tuto. U dunɔɔna ma ne jan wuo dii niaa sariya. U ne jan wuo laaba ta, u ne jan bira wuo jon cheeriŋ piba a ŋaa di ba suu. Kubɛɛ ne kama maa, di ma chichei ma dɔŋsun tiŋŋaa yiriŋ?

Má pɔ ba-bii-bal wiaa ŋaaniŋ

¹³ Bee na ma nialiŋ si yie bul ari maachie ma jan mu taŋ deen a yalle bayaliŋ a yi jina a na nyuurun, ma paala bi chiemiŋ wiaa jin.

¹⁴ Ma miisiŋ bi kuŋ-kala ŋaa. U nage burun si yie tɔ ne chichuɔŋ, ka muapilii wia pose u lel.

15 U fa maga di ma bul ari Wia ne seye di la ken miisin, la jan naa na.

16 Ama ma haa nmoo ma boye le ne aa dage ma titia. U nii bi zo.

17 Di nuu ne jima ari wii ne maga duu naa ka u via duu naa wii-la, u naa haache ne.

5

Wii-la si jan naa nialin si ken kiaa le

1 Ma nialin si ken kiaa, ma jegile nii mi teen. Ma na nmoo nin! Bua kubala ni ko, bua-la le ma jan faasa na he.

2 Ma ku-dan-la suomo chichei ne. Mogulun ma suomo didii ma gennin.

3 Ma selime kiaa ari ma moribii-biin ma kala ne sua. Kialin si sua nii daga ari ma bi worun naa. Ma kialin si sua nii, nii titia ne ma yaraa ma jan pua a nage nyinin ne die. Leele dunia kpage diderin ne, an ka ma-na ha paa kiaa fifaa. U bubun ne be?

4 Ma gure nialin maa, ma si naa ba tin ma bagisin le ne. Ba ni naa gon ma le. Gon-la juu la Tiina Wia digilaa ne, nii-la si ben dunia kun-kala.

5 Ma si he dunia le, ma nii sima a naa ma tuore wiaa. Ma si dii kiaa a waa a nere nii, ma nage nesin ba si diesa ba nere di ba kpu ne. Di ba ne dii ma sariya, ba jan jon cheerin pima di ma suu nii titia.

6 Ma bi worun naa, ma si jon cheerin pi nialin si bi wii cheye, ka ma kpuba. Ka ba bi wii naa di ba laa ba titia.

Má keŋ kenýiri a chuchuoŋe Wia

⁷ Mi naanɓiirin, má keŋ kenýiri a gberɛ cheɛ-la la Tiina Yesu si jaŋ miira kɔ. Má na paara, u si keŋ kenýiri nii. U yie gberɛ duonɗ-puso. Duonunɗ nii, u duu kiasa, a bira keŋ kenýiri a gberɛ gbanɗchaanɗ-duonunɗ ɛ u kiasa wase, u ta.

⁸ Má ɗaa kukeri a ma keŋ kenýiri nii. Má nyage ma boye worunɗ, beɛ wiaa tapulii-la la Tiina Yesu si jaŋ miira kɔ ka kpage ne.

⁹ Mi naanɓiirin, ma sí wiaa gurimu donɗo ɛ, di Wia sí ma sariya dii a jon cheerinɗ pima. Na nii-la si jaŋ dii la sariya ne chinɗ boinɗiinɗ a ɗaa siri duu juu nii.

¹⁰ Mi naanɓiirin, má na nialinɗ síi bul wiaa, la Tiina Wia Din-zonɗ-la dolunɗ ɛ. Ba na heɛn worunɗ an ha keŋ kenýiri. Má ɗaa kukeri an ma to ba naa-buasunɗ a ma keŋ kenýiri.

¹¹ Wia pe nialinɗ si wuo nyalime nii a mu dere ɛ worunɗ. Má bira na nii baal kubala ba síi yire Job si na heɛn an nyalime nii. U heɛ-la hariɗ ɛ la Tiina Wia peɗu ɛ a leɗ u nii sima. Wutitii, la Tiina Wia ka fála nennige kinɗenɗ kinɗenɗ.

¹² Mi naanɓiirin, siifianɗ wiinɗ ne mii che mi bula pima. U ne ɗla: Di ma ne si ma jaŋ ɗaa wii, ma sí ɗmiesu. Ma sí wia nyunɗ kunɗ ɗmiesu, ma sí tinɗeenɗ kunɗ ma ɗmiesu, koo ma sí kunɗ-kala ɗmiesu. Di ma ne seye, u maga di ma bul, “Oo, la seye ne.” Di ma ne bira bi seye maa, u maga di ma bul, “Ai, la bi seye,” an sí ɗmiesu. Di ma níi ɗaa nii, Wia bi jaŋ jon cheerinɗ pima bua-la ɛ u si jaŋ dii ma sariya.

13 Di nuu ne he ma tuon aa na heen, má leñ duu chuole Wia a sulu duu peu le. Di nuu ma ne he ma tuon, u tuon tore, má leñ duu yi yiilaa a denne Wia.

14 Di nuu ma ne he ma tuon a wiwiile, má leñ duu yire nialin si laa Yesu wiaa dii aa hilimi ba tuon kuhiasin di ba ko u teen a chuole Wia pu. Ba sii chuole Wia nii, má leñ ba loge nuun a tisu, an sul Wia pu la Tiina Yesu dolun le.

15 Di ba ne laa dii ari Wia jan sene naa wii-la ba si sulu chiche, u jan leñ di nii-la sii wiilu duori a ken dolun. Di u ne naa haacheba maa, Wia jan jon ba kala cheu.

16 Nii wiaa, má dage ma titia haacheba a pi dono a sul Wia a pipi dono, di Wia wuo naa di ma bira ken dolun a duori. Di tuo-pul tiina ne sul Wia, u Wii-sulun yie faasa ken dolun ne. Duu ne sul Wia a chiche wii, wii-la yie sene naa ne.

17 Má na baal kubala baa yire Ilaaja. U ma fa nage la ne. U faasa sul Wia ari siifiesin di duonun si nii. Duonun sene bi nia jisin batori ari chensin balidu.

18 Nii harin le ne u bira sul Wia a chiche duonun. Nii ne Wia leñ duonun nii, ba duu kaa, ba kala wase.

19 Mi naanbiirin, di ma tuon nuu ne faa to wutitii le an bira leñ wutitii-la, ka nuu don bira kenu kaa miira ko u tuto wutitii-la,

20 u tiina si naa nii pe haache tiina-la le u leñ u wu-bonono naanin an miira ko a tuto wutitii-la. U jan laa tiina miisin pu. Wia jan chese nii-la haacheba kala ta. U bira bi jan liliisi.

Mi teniḡ dideriḡ ne ḡii.

**Yesu Kiristito Wu-Zɔŋŋɔɔ (Ghana)
Sisaala-Tumulung NT Ghana**

copyright © 2014 Wycliffe Bible Translators, Inc.

Language: (Sisaala, Tumulung)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 11 Jun 2026 from source
files dated 29 Jan 2022

b3eb8618-120f-5a96-8c1c-1dbc16914330